

■ OR DAL DICZIUNARI RUMANTSCH GRISCHUN

## L'uolp rentada

A Danis era ei inagada in catschadur. In di ch'el era el sin via per ir a catscha vegn el en in uaul ed engarta buca lunsch naven in'uolp sper ina cuscha. El va pli datier per ir a siet. Mo alzond la buis, vesa el che l'uolp ei rentada cun in sughet vid la cuscha.

«Quei cheu ei buca diltut recl!» va ei tras siu tgau. El pren il cunti ord sac e taglia il sughet. L'uolp dat il tgau, sco sch'ella less engraziar, e sbriga naven.

L'auter atun va il catschadur cun ina roscha tiers alla fiera da Ligiaun. El ha buca saviu vender tuts sin quella fiera ed ha stuiu ir vina-von viers l'Italia cun ina part.

Passond el tras in marcau, auda el a clamar siu num. El mira anavos e vesa sin la lautga d'in palaz ina signura che cloma el. La dunna envida el en casa e survescha ad el ina stupenta marena.

Suenter marena damonda ella, tgei ch'el vegli per ses tiers, ella

cumprassi bugen quels. Igl um damonda ina gronda summa. Per siu grond smarvegl va la dunna per ils raps e paga ora la summa en daner blut!

«Ussa prendeì puspei vos tiers e vendeì els vinavon!» di la dunna, «jeu schenghegel els a vus. Pli baul haveis vus era fatg bien cun mei.

Jeu erel quell' uolp, rentada cun ina sughet, che vus veis schau liber.»

Ella ha lu raquintau ch'il giavel vevi rentau ella vid quella cuscha, perquei ch'ella levi bandunar la societad da striadira. El hagi liberau ella cun tagliar il sughet, ed ella resti adina engrazievla ad el.



Fiera da Ligiaun 1799 (dessegn Rocco Toricelli)

Foto Museo civico di belle arti, Lugano